



2021

ISLA(•)NLINE

Diahuebs 11 Maart 2021

Email: IslaOnline@gobierno.aw Tel: 528-4900

2021

AÑA DI RECUPERACION

ISLA ONLINE

NOTICIA DI GOBIERNO



GOBIERNO DI ARUBA



Prome Minister Evelyn Wever-Croes: Riba Dia Internacional di Hende Muhe, **PROME MINISTER A REUNI CU 5 MUCHA MUHE ENTRE 7 CU 9 AÑA**

8 di maart, riba Dia Internacional di Hende Muhe, como un custumber ya pa 3 aña consecutivo, Prome Minister Evelyn Wever-Croes ta organisa un conferencia pa hende muhe na unda sala na Renaissance Conference Center ta keda completamente yen. E aña aki debi na e pandemia esaki no tabata posibel. Participantenan di añanan anterior, pa cu esaki a cuminsa muestra interes den e actividad di e aña aki. Prome Minister, no a laga e dia aki pasa sin mas y a duna e Dia Internacionl di Hende Muhe un toque especial y diferente.

Prome Minister a scoge pa invita 5 mucha muhe entre 7 cu 9 aña pa reuni cu nan na Bestuurskantoor. Nan a bishita Prome Minister na su oficina pa un ora y a sinta y papia di e posicion di hende muhe. Un conbersacion pa e edad aki, sigur interesante pa sa di unda e hende muhenan a bin mas di 100 aña pasa, caminda mucha muhenan no por a bay scol, mucha muhenan tabata tin menos derecho cu mucha homber y adulto muhenan no por a traha.

Durante e encuentro special aki a cubri varios topico cu e muchanan aki no por a imagina nan mes pasobra awendia cosnan no ta asina mas.

“Imagina si awendia e yiu homber mag bay scol pero e mucha muhe no. Eseyan ta cosnan cu nan no ta custuma cu ne y nos a combersa basta rato riba esaki y con a nan como mucha muhe ta weita bida. E ta bunita pa wak cu den nan vision no tin luga pa discriminacion cu un hende homber por gana mas placa cu hende muhe cu mesun trabou, of cu un hende homber por abusa di hende muhe of cu hende homber bal mas cu hende muhe y esey bal mas y ta hopi importante.

Na fin di e encuentro despues cu nan tambe a haci hopi pregunta, mi ta sigur cu mi meta a keda cumpli. Mi kier tabata sigur cu porlomenos 5 mucha muhe riba Dia Internacional di Hende Muhe ta sigur cu nan por tur cos cu nan propone nan mes. Cu nunca niun hende mester laga nan sinti nan menos. Cu nan mester tin confiansa den nan mes y cu nan por logra tur



nan metanan. Esaki sigur mi a confirma na fin di e encuentro. Y di aki, e 5 mucha muhenan aki por conta otro muchanan y asina mas mucha muhe ta wordo empodera for di un edad asina young.

Mi ta spera cu esaki tawata un inspiracion na tur hende muhenan adulto. Cu nos mester traha riba nos mucha muhenan pa nan por enfrenta den bida tur loke cu nan kier. E tabata un ora hopi ameno y un encuentro cu a yena mi cu hopi energia pa traha especialmente riba empodera nos hende muhenan. Nos hende muhe ta fuerte, resiliente, creativo y innovador. Mi conseho final na cada un di nan y na cada mucha muhe den nos comunidad ta pa no laga niun hende pensa cu bo no bal. Danki na cada mayor cu a permiti pa esaki cu a laga mi sumamente encanta”, Prome Minister a expresa.

Prome Minister Evelyn Wever-Croes: BO KIER TA PERIODISTA PA UN DIA?

Ministerio di Asuntonan General conhuntamente cu Ministerio di Asuntonan Social ta desea di enfoca riba e importancia di Prensa den un pais democratico.

Ta sumamente importante pa desaroyo sano di un pais pa sigui eleva e nivel di suministro di informacion.

P'esey, Gobierno di Aruba a dicidi pa duna enfoca na nos muchanan, nos futuro periodistanan, nos prensa di mayan. Pa medio di un proyecto "Periodista Pa 1 Dia", lo duna espacio na nos muchanan pa cera conoci di un manera practico kico ta e trabou di un periodista y asina stimula e interes den nos muchanan pa studia den e ramo di Prensa Profesional.

Durante 5 siman nos Minister-President sra. Evelyn Wever-Croes, lo habri portanan di gobernacion pa un grupo selecta di nos muchanan di Aruba haci pregunta durante e conferencia di prensa hubenil.

Pa prome biaha nos muchanan lo haya oportunidad pa haci Minister-President pregunta en persona y haya contesta riba nan preguntanan. Muchanan di scol basico por registra online cu asistencia di un mayor of representante y haci tres pregunta di e mucha su interes a traves di e website www.specialprojectsaruba.org y despues cu a registra online lo ricibi automaticamente un email di confirmacion di inscripcion den inbox (of junk mail). Tambe por download e formulario riba e website, print e, yen'e, y entreg'e na Bestuurskantoor. Etnan cu e preguntanan mas interesante lo haya e oportunidad unico aki pa participa. Ultimo fecha pa registra pa participa ta dialuna 22 di maart.

Tuma esaki como un invitacion personal di nos Minister-President na nos muchanan. Si bo yiu tin un interes pa ta periodista pa un dia y participa hunto cu otro hoben durante un conferencia di prensa hubenil, bishita e website www.specialprojectsaruba.org y haya mas informacion con pa inscribi y cu e chance pa haya e oportunidad di sinta den un di e asientonan den e sala di conferencia oficial di Gobierno di Aruba! Nos ta ansioso pa bo participacion.

PERIODISTA PA UN DIA

BAN STIMULA NOS MUCHANAN PA STUDIA PERIODISMO

Bo kier ta **periodista pa un dia**? 50 di 10.000 mucha na Aruba lo haya e oportunidad pa haci nos **Minister-President pregunta** durante e prome conferencia di prensa hubenil y sinti e **sensacion di ta un periodista!**

Si esaki ta algo cu bo ta haya great, skibi akibou cua ta e 3 preguntanan cu **ABO lo kier puntra sra. Evelyn Wever-Croes:**

50 muchanan di scol basico cu e pregunta nan mas interesante ta wordo invita pa haci nan pregunta na Minister-President en persona

Scol: _____ **Klas:** _____

Number: _____ **Edad:** _____

pregunta 1 _____

pregunta 2 _____

pregunta 3 _____


Forma parti di nos conferencia di prensa hubenil
Bishita **specialprojectsaruba.org**

UPDATE COVID-19 CONFERENCIA DI PRENSA:

CASONAN ACTIVO

CORONAVIRUS
COVID-19
Aruba

13 MRT 2020 - 10 MRT 2021



HISA BO BANDERA
NA MITA!

DIASABRA **13 DI MAART, 2021**

“MINISTER PLENIPOTENCIARIO BESARIL A REUNI CU SR. DRS. RON HOGENBOOM”

Tema recuperacion economico di Pais Aruba

Minister Plenipotenciario, sr. Guillfred Besaril, ti sigui explora e posibilidadnan na Hulanda y Europa pa stimula e economia di Aruba p'asina yuda saca nos isla for di e crisis actual di Covid-19. Den cuadro di e tema aki, Minister Besaril tabata tin un combersacion di orientacion cu e conocido economista di Netherlands Foreign Investment Agency (NFIA), sr. drs. Ron Hogenboom. Meta principal di e encuentro aki tabata pa repasa e areanan cu Gobierno di Aruba a identifica como sectornan prometededor pa Aruba su economia ('Promising Sectors of Aruba') pero mas importante kiko ta e condicionnan mas basico cu nos Pais mester tene cuenta cune pa ta realmente exitoso den nos plan di recuperacion.

Trece inversionistanan di exterior na Aruba ta importante. Akinan sr. Hogenboom ta accentua cu tin dos manera pa haci esaki. E prome aspecto ta pa crea e condicionnan nesecario pa inversionistanan. Den e cuadro aki, Aruba tin e ventahanan grandi den e region Caribense comokiera cu nos sistema legal ta acopla den terminonan general na esun di Hulanda. Esaki ta un punto conoci pa Aruba. Caminda e combersacion tabata realmente interesante ta riba e punto den cual nos sistema legal mester adapta mas rapido riba e cambionan economico premira Post-Covid. Un ehempel ta e uzo di tecnologia den e industria-creativo. E leyman na Aruba mester ta cla pa acomoda e uzo di tecnologia, tanto den e aspecto general como su mal uzo tambe p'asina e inversionista sintie protehi den su inversion. Otro elemento positivo ta cu Aruba a reconoce e implementacion di E-Governance como “Key-Component” den Aruba su desaroyo. Esaki por limita e asina yama “Red Tape” cu ta stroba inversionistanan na momento di kier cuminsa opera na nos isla.

Segun sr. Hogenboom e di dos manera ta si e Pais mes kier stimula su economia pa medio di inversionnan di parti di Gobierno. Esaki no ta algo inusual cu den e teorinan economico ta conoci como “Economia Keynesiana”. Condicion importante pa e teoria aki funciona ta, cu e Pais mester tin placa! Pues un pensamiento cu a haña cierto acogida despues di e crisis financiero mundial di 2007-2009 pero cu resultado mixto depende di e Pais cu a implementa esaki y cu pa Aruba na e momento aki sigur no ta factibel mirando e situacion cu Aruba ta pasando aden pa motibo di Covid-19.

Minister Besaril hunto cu sr. Hogenboom a repasa e plan economico di Gobierno y den liña grandi ta deacuerdo cu Aruba ta riba bon caminda asina sr. Hogenboom a comparti. Na final di e combersacion a keda palabra cu lo bai tin un combersacion cu Minister di Asuntonan Economico pa concretisa pasonan pa stimula economia di Aruba.



Ron Hogenboom tin 3 aña ta traha na NFIA y como economista e tin 25 aña di experiencia den e mundo bancario y na diferente ministerionan na Hulanda, entre otro Finanzas y Asuntonan Economico. Tambe e tin experiencia den exterior, unda ela ocupa funcionnan na embahada di Reino na Berlin, consulado general di Reino na München y na e ministerio di Finanzas di Alemania.



MINISTER DI FINANSA, ASUNTONAN ECONOMICO Y CULTURA

MINISTER XIOMARA MADURO

MINISTER MADURO A FIRMA DECRETO PA E CURSO DI 'HOOFDKOMMIES' POR CUMINSA NA DEPARTAMENTO DI ADUANA

E siman aki Minister Maduro a firma e decreto ministerial pa duna inicio na e curso di 'HoofdKommies' di Aduana. E ta un curso pa amplia e conocimiento di e Aduaneronan cu ta dirigi riba practica. E curso tin un duracion di 1 aña y 52 Aduanero lo bay tin e oportunidad pa amplia nan conocimiento y obtene e rango di 'HoofdKommies.' Minister sra. Xiomara Maduro ta desea tur Aduanero participante hopi exito y ta gradici sra. Antonia Werleman 'Hoofdverificateur', kende lo encabesa e curso importante aki pa Departamento di Aduana. Presente tambe tabata e director di Aduana sr. Ricky Croes y sra. Gabriela Kock-Helder kende ta funcionario di recurso humano di Aduana.



MINISTER XIOMARA MADURO Y MINISTER PRESIDENT EVELYN WEVER-CROES A REUNI CU CAFT RIBA VARIOS TOPICO

E recorte den AZV ta keda punto di preocupacion

Recientemente Minister Maduro hunto cu Minister President a reuni cu CAFT riba nan trabounan di supervision financiero di Aruba. A trata diferente topico, entre nan, ehecucion di presupuesto 2020, maneho financiero, recorte den AZV, sosten financiero, y situacion na Serlimar. Regularmente e mandatarionan ta reuni cu e miembronan y e secretariado di CAFT pa asina por brinda e informacion necesario pa e trabou na bienestar di Aruba por wordo haci na un manera eficaz.

'Recorte di 5 miyon pa luna den gasto AZV ta keda un preocupacion di Gobierno'


Un tema cu ta keda un preocupacion di e mandatarionan ta e recorte den AZV. Un di e prome condicionnan cu Consejo di Reino a impone pa Aruba yega na remarca pa fianza pa surpasa e crisis di COVID19, tabata un recorte di 5 miyon florin pa luna den gastonan di AZV. Apesar cu for di banda di Gobierno a cuestiona e condicion aki di corta den gasto di salubridad memey di un pandemia, Gobierno a cumpli den aña 2020 cu e condicion aki. Na e momento eynan e tabata crucial pa Aruba haya e finansnan necesario pa yuda comunidad surpasa e crisis. Pa aña 2021 tambe e recorte aki di 60 miyon florin ta keda como un condicion y esaki ta trece preocupacion y inquietud grandi cune. Principalmente pasobra te ainda no tin un splicacion ni di Ministerio di Asunto Interior di Hulanda, ni di Consejo di Minister di Reino y tampoco di CAFT pa e suma di recorte aki. CAFT ta conseha Consejo di Minister di Reino riba e punto aki tambe y pesey den e reunion Minister President a bolbe pidi un splicacion di CAFT riba nan recomendacion pa corta den salubridad di Aruba memey di un pandemia.

'IMF tambe preocupa pa recorte den AZV'

E topico di e recorte grandi aki den gasto di AZV sin un splicacion debido tambe a hala atencion di IMF kende nan e ultimo dos siman a haci un evaluacion financiero y economico di Aruba via su 'Article IV mission.' Segun IMF mester tene hopi cuidou pa no debilita e cuidu medico net awor cu Aruba ta na man di un pandemia sin precedencia na mundo.

'Te ainda no tin un splicacion conciso pa e recorte di 60 miyon den aña 2021'

Den e reunion cu CAFT e mandatarionan no por a haya un splicacion conciso dicon den aña 2021 tambe ta necesario pa corta 60 miyon florin den gasto di AZV. A splica cu e sector medico a reuni pa asina por bin cu un propuesta con pa aplica recorte den gasto di AZV, pero djies corta 60 miyon den salubridad sin un splicacion y memey di un pandemia ta algo cu ta keda inexplicable.





Minister Glenbert Croes: FASE A TRECE E ALIVIO PA OTRO CU A PERDE TUR COS



Na caminda pa e prome aniversario di un crisis nunca antes bisto den historia di Aruba causa pa COVID19, Minister Glenbert Croes no por laga e dia aki pasa bay sin para keto un rato y bisa DANKI na tur cu a haci FASE posibel.

19 di maart proximo ta cumpli exactamente un aña cu Minister Glenbert Croes a anuncia introduccion di e Fondo di Asistencia Social di Emergencia esta FASE. E momento ey sin sa ni con ni di unda, pero cu un certesa den mente, e lo no a laga e pueblo aki sin ningun clase di ayudo. E mandatario tabata determina pa hinca den otro un asistencia na tur cu a perde trabou. Di anochi pa mainta a traha e website y 20 di maart e prome aplicacionnan a cuminsa drenta, cu finalmente a bira un ayudo di AWG 950 pa 10.777 persona kendenan a ricibi e prome ayudo fin di april 2020.

Pa haci e situacion financiero di Pais Aruba cargabel, a cuminsa cana diferente caminda y canal di ayudo. A bay den

negociacion cu Hulanda pa por haya ayudo financiero. Minister di Finanzas y nos Minister President tabata negociando pa por logra subsidio di salario pa comercio mantene lo mas hopi hende cu ta posibel na trabou. Gobierno na mes momento mester a corta gasto y mester a cuminsa na su mes (leading by example) y a anuncia cu e Parlamentario- y Ministernan ta entrega 25% di nan salario y tur empleado publico lo entrega 12.6%. Ta danki na e entrega y sacrificio aki, cu proximamente nos por conmemora e prome aña ta yuda un otro cu a perde tur cos.

Y ley di bida y palabra di Dios ta bisa bo, yuda un otro sin mira con. E mandatario ta sumamente agradecido cu e sacrificio colectivo aki a haci posibel un causa mucho mas grandi cu nos mes: esta di yuda miles di persona cu a perde tur cos. E sacrificio di e aparato publico cu ta haci FASE posibel, a pone pan riba mesa pa nos criaturanan, a pone cuminda den tayo pa nos conciudadananon, a trece paz unda tabatin tormenta, calma ora cu no por a mira solucion mas.

Minister Glenbert Croes ta bisa danki na e aparato gubernamental: "Mi ta sumamente orguyoso y agradecido di ta yiu dje pueblo aki cu tanto mi ta admira, yiu dje pida baranca aki cu tanto mi ta stima. Y cu e mesun admiracion, respet y aprecio aki mi lo sigui lucha pa esun cu a perde tur cos".





MINISTER DI HUSTICIA, SEGURIDAD Y MIGRACION

MINISTER ANDIN BIKKER



Minister Andin Bikker: MANEHO STRATEGICO Y COHERENTE DUNANDO RESULTADO



E ultimo dianan aki, casi a base diario autoridadnan ta teniendo accionnan exitoso relaciona cu cuido di nos costanan. “E ta un esfuerzo grandi, combina cu aumento den presupuesto, ekipo y hende, pa garantiza mas seguridad na nos costanan”, asina Minister mr. Andin Bikker a bisa awe mainta.

E ta referi na e accion combina di Radarkamer di Cuerpo Policial y Kustwacht cu a conduci na detencion di no menos di 14 persona cu di forma ilegal a purba drenta nos isla via boto.

E intensificacion di cooperacion entre Cuerpo di Polis, Kustwacht y Guarda Nos Costa, den un esfuerzo pa sigui traha conhunto den un solo meta ta dunando frutonan palpabel. A promove y percura pa ekipo adicional pa Cuevo Policial, Kustwacht y Guarda nos Costa pa por tin mas control efectivo na costanan y riba nos isla.

No por keda sin menciona e logro grandi di reintroduci un radar y helicopter pa nos Cuerpo Policial por detecta botonan for di

momento cu nan sali y drenta nos awa territorial. Mayoria bes autoridad ta wardando nan caba, hasta prome cu nan yega nos isla cu hende, cu droga, arma y hasta animalnan exotico, cu ta purba importa di forma ilegal.

Aunke cu tin progreso enorme den e organisacionnan y mas ekipo pa por sigui garantiza seguridad memey di un pandemia y retonan di salud y di un economia fragil, ainda e trabou no ta cla. “Nos ta trahando duro, tur dia, pa sigui cosesha logronan importante pa sigura cu nos ta mantene tur esunnan cu no por drenta den forma legal, pafo di nos isla. Aruba definitivamente no por carga e peso di e retonan socio-economico na nos pais bisiña. Nos ta un pais cu nos propio retonan”, asina Minister mr. Andin Bikker a termina bisando.





Minister Dangui Oduber:

AWE NOS A CUMINSA CU E SEGUNDA TANDA DI VACUNA

Diaranson atardi Minister di Salubridad Pulico Sr. Dangui Oduber tabata presente na Club Don Bosco na Noord caminda den oranan di mainta a cuminsa cu e segunda tanda di vacuna. Manera planea den e programa di ehecucion di vacunacion diamars atardi Aruba a ricibi un total di 12800 vacuna di Pfizer.

Aruba ta yegando 30 mil persona cu a registra pa haya e vacuna, ya caba mas di 11 mil hende a vacuna di cual mas di 9 mil ta persona riba edad di 60 aña. Como cu e registracion ta bayendo asina bon Aruba cu Hulanda a acorda cu Aruba lo ricibi su di 3 batch di vacuna cada 2 siman embes di 3 siman manera e tabata acorda anteriormente. Aruba tin capacidad pa vacuna mas di 1500 persona pa dia y compara cu e otro islanan den reino Aruba ta sobresali den mas registro pa e vacuna.

Minister Dangui Oduber ta keda pidi pueblo di Aruba pa registra si ainda bo no a haci esaki. Baha e aplicacion di "Aruba Health App" of acudi na un di e 4 oficianan di MFA rond di nos isla y registra pa haya e vacuna. Personanan cu ta indocumenta tambe por registra pa haya e vacuna pero esaki por sosode solamente na e oficianan di MFA. Tambe Minister Oduber ta pidi e familiarnan mas jong pa yuda nan famia di mas edad cu no por traha cu e aplicacion pa registra, un yuda otro.

Minister Oduber kier a gradici comunidad di Aruba pa nan participacion den e campaña nacional di vacunacion. Hunto nos lo logra vence e pandemia aki. Ban sigui vacuna Aruba, ban sigui salba bida y ban prospera pa nos por progresa.



Minister Dangui Oduber: A REUNI CU CAMARA DI COMERCIO TOCANTE E PROGRAMA NACIONAL DI VACUNACION

Dialuna atardi Minister di Turismo, Salubridad Publico y Deporte Sr. Dangui Oduber a reuni cu e bestuur di Camara di Comercio. Den un manera hopi transparente e mandatario a presenta e programa nacional di vacunacion. E tabata un encuentro fructifero caminda a discuti diferente tema.

Minister Oduber a musta Camara di Comercio con e programa nacional di vacunacion ta canando. A papia riba fechanan di entrega di e vacuna como tambe e cantidad di vacuna cu tin planea pa ricibi. Minister Oduber a indica na Camara di Comercio e capacidad di cuanto persona por vacuna riba un dia. Di e forma aki Camara di Comercio ta haya un bista di kiko nan por spera den e lunanan nos dilanti y traspasa e informacion valiosonan aki serca nan miembronan.

Minister Dangui Oduber y Camara di Comercio a intercambia pensamento riba turismo y economia. E programa di vacunacion ta hopi importante pa e recuperacion di Aruba su turismo y economia. Unabes mas y mas hende ta vacuna Gobierno por flexibilisa e medidanan impone, por ehempel e orario di cierre y toque de queda. Esaki lo trece aumento den e benta pa e negoshinan den e sector turistico.

Den cuadro di esaki Minister Oduber a pidi Camara di Comercio pa nan cooperacion den yuda Gobierno cu e parti di registracion. Camara di Comercio a bay di acuerdo cu nan lo yuda percursu pa tur compania registra nan empleadonan pa haya e vacuna. Camara di Comercio tambe ta di pensamento cu e vacuna ta e unico herment cu tin pa Aruba por Sali di e pandemia aki y cuminsa recupera su economia.


Minister Oduber ta contento cu Camara di Comercio a ofrece pa yuda den e proceso importante aki y ta consiente con importante esaki ta pa Aruba su economia. Danki pa contribui cu pais Aruba.



PRESENTACION DI ARUBA TOURISM AUTHORITY


CONFERENCIA DI PRENSA 11 MAART 2021:

Visitor Arrivals 1980-2021



One happy island + ARUBA.COM

STAY-OVER VISITOR ARRIVALS Jul 2020 - 2021




Source: A.T.A.

PRESENTACION DI ARUBA TOURISM AUTHORITY


CONFERENCIA DI PRENSA 11 MAART 2021:



Gradual Recovery Scenario 2021



Average Daily Tourist Spending (ADTS) 2011-2020



Source: A.T.A. / CBA
2020 Estimated Final

Gobierno di Aruba:**CONMEMORACION Y PROGRAMA SPECIAL****‘Pa nos recupera, nos mester sigui recorda’*****Diasabra 13 di maart, 2021 for di 6or di atardi***

Riba un diabierna, 13 di maart, 2020, Gobierno Aruba a afirma cu Corona Virus a drenta Aruba. Algo cu sigur tawata inevitable pa tanto nos pais como pa mundo henter. Cu entrada di Covid Aruba a conoce un desaroyo nobo, un crisis nobo pa nos pais, un crisis sin precedencia. Gobierno di Aruba mester a tuma medidanan di precauacion riba salud y tambe pa mantene nos pueblo bon informa y protegi y contene e virus miho cu tawata por. Nos pueblo a sa di coopera pa asina e virus no plama y bira mas devastador.

Awe, nos ta mira tras riba un aña cu nos pueblo ta den e pandemia aki. Un aña cu mundo henter a realisa cu e normal cu nos tawata conoce a wordo altera dia pa dia. Un aña di frustracion, dolor, perdida di entrada y tristeza pa hopi famia cu a perde nan ser keri na e virus aki. Un tristesa cu nos pueblo a sinti cu cada ciudadano di nos pais cu a fayece. Tambe, un aña na unda nos pueblo a uni den solidaridad pa brinda

yudansa na esnan cu mas tawata tin mester.

Gobierno di Aruba, riba e fecha aki, ta organisa un acto di conmemoracion especialmente pa recorda tur esnan cu a fayece cu e virus. Despues di esaki, lo sigui un programa special di informacion y oracion pa recorda un aña di Covid na Aruba. ‘Pa nos recupera, nos mester sigui recorda’. Esaki lo wordo pasa live via Facebook di Gabinete Wever-Croes y na nos canalnan di television. Sintona e programa special aki diasabra 13 di maart, 2021 for di 6or di atardi.

Durante henter dia, banderanan di Aruba lo ta na halfstok y Gobierno di Aruba ta invita pueblo di Aruba pa e dia aki, laga e bandera di nos Aruba dushi tera bula na halfstok como muestra di aprecio y sosten na famianan cu a pasa door di e tristesa aki y conmemora esnan cu a perde e bataya.

UNI CU NOS DEN UN PROGRAMA SPECIAL.**PA NOS RECUPERA
NOS MESTER SIGUI RECORDA****UN AÑA DEN PANDEMIA****DIASABRA
13 DI MAART, 2021****6:00 PM**

Departamento di Salud Publico:

UPDATE 11 DI MAART 2021

Segun resumen di awe 45 persona a recupera, a registra un total di 45 caso nobo di Covid-19, di cual 3 ta no-residente. E cantidad total di testnan ehecuta ayera na e diferente localidadnan na Aruba, entre otro laboratorio di hospital, laboratorionan priva y aeropuerto ta 563 test. 'Postivity rate' entre nos residentenan ta 23%.

Casonan activo pa awe ta 221, cantidad di fayecido relaciona cu Covid-19 ta 77.

Hospital ta informa cu tin un total di 19 persona interna di cual 7 ta den Cuido Intensivo y 12 riba unidad general di covid. Edad promedio di esnan ingresa pa extra cuido ta 63 aña.

 ARUBA COVID-19			
11/3/2021	TOTAL	RESIDENTE	NO-RESIDENTE
Casonan Nobo	45	42	3
Activo	221	194	27
Recupera	7974	7495	479
Positivo	8272	7765	507
Negativo	102883	-	-
Getest	111433	-	-
Getest na Airport	71389	-	-
Morto	77	76	1





Un Feliz Dia

GABINETE WEVER-CROES

ISLA ONLINE
NOTICIA DI GOBIERNO